

Q. D. B. V.

DE

**MORBIS OCULO-
RVM PRAECIPVIS
RECTA MEDENDI
RATIONE**

PRAESIDE

PRO-RECTORE ACADEMIAE MAGNifico

D. FRIDERICO HOFFMANNO

ORDINIS MEDICI SENIORE ET h.t.

DECANO

PRO GRADU DOCTORIS

DXV OCTOB. ANNI **cl** lcccxxiix.

DISPUTABIT

**FRANCISCVS ALBERTVS
REDECKER**

HERFORDIA - WESTPHALVS

HALAE MAGDEBURGICAE

LITERIS CHRISTIANI HENCKELII ACAD. TYP.

70

THE
RECORD
OF THE
CITY OF
NEW YORK

OF THE
CITY OF
NEW YORK

OF THE
CITY OF
NEW YORK

OF THE
CITY OF
NEW YORK



DISSERTATIO INAUGURALIS
DE
MORBIS OCULORVM PRÆ-
CIPVIS RECTA MEDENDI RA-
TIONE.

PROOEMIUM.



Am artificiosa oculi est
fabrica, tam mirabilis textura,
tam varius & multiplex par-
tium in eo apparatus, tam nobi-
lis ipsius usus atque functio, ut
nulla omnino ex corporis huma-
ni partibus cunctis, huic æquipa-
rari possit & tam luculenter summam summi condito-
ris sapientiam monstret atque confirmet. Quod si e-
nim penitus oculi structuram rimamur, multa profe-
cto singularia prorsus in ea occurrunt, quæ ipsam faci-
ciunt admirandam ac nullibi in universo corpore ita
reperiuntur. Exigua quippe optica hæc est machina,
& tamen tot ad eam movendam concurrunt muscoli, ac
ad nullam aliam quantumvis amplam corporis partem,

ut Anatomici præter superciliarum corrugatorem, palpebrarum constrictorem, elevatorem & depressorem, vel sex in homine numerent musculos, oculi bulbo tantum proprios, obliquos nempe binos & quatuor rectos. Nervorum dein longe plures etiam ad oculum ex novem cerebri paribus feruntur, quam ad unam e reliquis corporis partibus aliam. Secundum enim par orbitam oblique ad latus nasi ingreditur, & in fundo mucii instar teneri in retinam sic dictam tunicam explicatur, sicque principaliter visui servit. Tertium par oculorum est motorium, & prope orbitam in sex ramos finditur, ad palpebras, musculos & tunicas oculi abeuntes. Quartum par trochlearem musculum subit patheticumque ideo vocatur. Quinti demum paris ramus superior ophthalmicus & potissima sexti abducentis paris portio, per oculi musculos, membranas, palpebras harumque musculos conspicuos satis spargunt furculos. Porro inter innumeras fere corporis tunicas atque membranas nulla est, quæ tam albi & nivei coloris, quam in oculo albuginea, nulla tam obscuri & variegati aspectus, ac uvea & choroidea, nulla etiam tam transparens, ac cornea. Nullibi quoque adeo pellucidi & diaphani succi a sanguine secernuntur ac in oculo aqueus & vitreus humores, qui radios luminis recta transmittunt linea. Tum conspicuum illud rotundum in uvea foramen, pupilla dictum, per quod radii luminosi ad internum oculi cavum transeunt, limbo orbiculari ex variis nerveis & carneis fibris tanto artificio instructum est, ut solius lucis contactu & motu notabiliter se contrahat, deindeque lumine, iterum sese ampliet. Præterea altioris utique inda-
gi-

ginis est, hoc visus organon ex frigidis esse & in humido maxime consistere, frigus tamen & frigida medicamenta, in morbis quoque calidis, commode ferre, a frigoris libere allabentis iniuria non adeo infestari, multominus humorum congelationem experiri unquam. Accedit, quod nullibi in universo corpore, tot ac tam variæ partes ad unam contexendam concurrant, quam ad oculum, in quo visuntur non pili crescentes, cartilagine, variæ magnitudinis glandulæ, nervi, muscoli, differentis texturæ membranæ, diversi ductus venosi, arteriosi, excretorii, aquosi, succi variæ consistentiæ & coloris, nec non pinguedo, orbitæ interius, ad excipiendum molliter bulbum, undiquaque in fundo inducta. Omnis autem hic tot tamque diversarum partium apparatus earundemque admirandus nexus, excellentem huius partis usum & singularem plane functionem esse, ultro subindicat. Et sane oculus nobile illud in corpore organon est, cuius ministerio visibiles omnis generis conditæ res menti humanæ repræsentantur, ut earum pulcritudinem, multitudinem, ordinem ac usum contempletur iisdemque ad celebrandam summi Numinis bonitatem & sapientiam permoveatur. Excubias quasi in suprema hac corporis regione anima agit, & prævisis tanquam in specula iis, quæ circa nos, ita incessum motumque corporis secundum voluntatem suam dirigit, ne externam quandam incurrat iniuriam. Quin nihil æque arctissimam illam animæ cum corpore unionem testatam facit, ac ea, quæ in hoc visus organo contingunt, dum pictis, mediante lumine, in retinarum externarum imagunculis, illico anima easdem, per binos oculos, non tamen duplices, videat, sed, uti sunt, accurate

cognoscit, æstimat & de iisdem iudicat. Nec ea propter certius discedentis e corpore in moribundis animæ ullum est indicium, quam immutatus oculorum habitus, evanescente post mortem omni ipsorum splendore. Ne dicam, oculos ipsius animi esse indices, & quasi fenestras, per quas in animum introspicere, ejusdemque indolem, habitum, affectionem, vigorem & dispositionem cognoscere licet. Sic itaque in spectatissimos multos usus conformata est artificiosissime oculi compages. Ille autem tam multarum & variarum partium hunc in finem concursus in causa est, quod nulla etiam in universo corpore pars adeo numerosis & multiplicibus morbis pateat, quam oculus, ita, ut quidam ex recentioribus plusquam centum morbos in unicam hanc parvam partem cadere asserant. Nos quidem jam etiam de morbis oculorum agere constituimus, sed specimen tantum meditamur academicum inaugurale, eamque ob causam præcipuas & in artis exercitio crebrius obvias ex oculorum passionibus seligemus, & quo pacto recte ac perite iisdem sit medendum, docebimus candide. Faxit Summum Numen ut noster hic labor cedat feliciter & in multorum emolumentum!

§. I.

PRima igitur in hac affectionum oculi pervestigatio ne esto omnium fere frequentissima, inflammatio videlicet ipsius, Græco nomine ophthalmia dicta. Hæc perquam facile ex rubore, tumore, ardore & dolore oculi cognoscitur. Neque enim ullibi tam aperte in conspectum venit inflammatio, quam in candida illa oculi albuginea tunica. Hæc

Hæc quippe, si oculus sanus, nivea nullisque rubicundis vasculis distincta comparet, in ophthalmia vero rubellis canaliculis tota perfusa conspicitur. Tumenim vascula arteriolarum lateralia, quæ secundum naturam pellucidum nulloque colore infectum liquorem vehunt, a sanguine valide ad caput congesto distenduntur, implentur & visui sese offerunt. Et hæc omnino ita evenire luculenter docet curiosum experimentum, quo injecto per siphonem in carotidis ramum liquore spissiusculo rubicundo, uti est cera rubra in oleo terebinthinæ liquata, adnata oculi tunica per omnem sui ambitum rufescens & inflammata sese repræsentat. Ex quo utique conficitur, in inflammationibus hisce sanguinem non tam qualitate & quantitate, quam potius motu & loco minus commode, nec non proportionem peccare.

§. II.

Est vero ophthalmia, vel levior, vel gravior, vel etiam gravissima. Levior albuginæ tantum tunicæ insidet & non tam late diffunditur. Gravior, præter adnatam, etiam confines palpebras corripit totumque oculum exquisito ardore & dolore afficit, qui ad levem lucis accessum exacerbatur. Diu etiam detinet, salsa acris lymphæ perpetuo exstillat, & si imperita medicatione excipitur, membranosi quippiam relinquit, ut pupilla ab iride vix possit distingui. Gravissima demum illa est, quæ profundior, ad ima oculi & interiores tunicas penetrat. Comitatur hanc sæpe dolor acerbissimus, cum febris, quandoque etiam cum delirio, sequitur suppuratio & humorum effluxus, remanente plenaria cœcitate. Rarius tamen a causis internis, sed plerumque

que a contusione validiori inducitur. Vidimus ejusmodi suppurationem excidente lente crystallina, post ictum fortem inter pugillandum oculo inflictum. Vidi vero etiam similem casum a tinea capitis inveterata, subito externis siccata.

§. III.

Mitior & non adeo profunda oculi inflammatio, ut plurimum a causa externa leviori, ut insperso pulvere, aut asperioris cuiusdam appulsu, plaga, aut allisu externo, aura frigidiori liberius admissa, sudore capitis repulso, item ab administrata cataractæ depositione, nascitur, ideoque haud adeo difficili negotio discutitur. In hac enim solum albumen ovi, cum aqua rosarum & pauxillo aluminis conquassatum, sufficit & omnibus fere aliis palmam præripit. Et notabile omnino est, leviozem hanc ophthalmiam solam frigida ejusmodi & repellentia ferre iisdemque sæpe unice abigi, quum omnes aliarum partium inflammationes & erysipelata, admotis ejusmodi refrigerantibus & repellente virtute præditis, mirum exasperentur.

§. IV.

Vicissim alterum illud ophthalmiæ gravius genus a causis potissimum internis proficiscitur, feri nempe impuritate & salutaribus excretionibus cohibitis. Nos certe frequentius observavimus, magnam & contumacem ejusmodi inflammatoriam oculi affectionem, a suppresso solenni matutino sudore, a scabie, nec non tinea capitis intempestive abacta, a cohibitis mensibus, ulceribus & fistulis consolidatis, repulsa gutta rosacea & id genus aliis, fuisse subortam. Et hinc utique est, quod mor-

morbus hic neutiquam solis externis cedat, sed interna efficacia exigat remedia, quæ serum recrementitum ab oculis divertant, falsos & acres humores diluant atque contemperent eosdemque successive per congrua emunctoria eliminant. Nos, quæ hunc in finem commendemus, habemus infusa theiformia, ex herba veronicæ, euphrasie, radice valerianæ & semine fœniculi, serum lactis dulce, aquas minerales, tam martiatas, quam alcalinas, acidulas vulgo dictas, quorum certe omnium in corrigendis oculorum vitiis, maximeque iis, quæ ab humorum acrimonia pendent, spectata est virtus, si largiori dosi, debito cum regimine & aliquandiu usurpentur. Non tamen intermittenda laxantia, pediluvia, nec non urgente plethora & suppressis criticis sanguinis evacuationibus, tempestiva venæ sectio.

§. V.

Quod si vero grandior adhuc & profundior oculum tenet inflammatio, & periculum est, ne interiora in suppurationem transeant, prætereaque corpus juvenile & sanguineum, malumque forte ab externa violentia inductum, e re est, ut repetita venæsectio celebretur, aut larga manu subtrahatur sanguis, & hoc quidem omnium optime per sectam jugularem venam, quo certe, in revellendis a capite sanguine aliisque humoribus, nihil efficacius. Abstinendum vero a collyriis refrigerantibus, & aqua potius sic dicta sclopetaria, cum aqua rosarum & florum sambuci remixta, adiecto paulillo croci & camphoræ, tepefacta, cum linteo duplicato, applicanda. Interius pugnandum leniter diaphoreticis, demulcentibus & solventibus, inter quæ salubritate antecellunt pulveres bezoardici cinnabarini,

leniter nitrosi & camphorati, pota simul loco ordinarii potus ptisana.

§. VI.

Nonnunquam etiam epidemica, neque minus periodica est ophthalmia, quæ vel quotannis, vel circa æquinoctium, vel singulis mensibus infestat. Tum vero vitium ut plurimum hæret in hypochondriis, aut natura sanguinis per nares frustra molitur secessum. Hinc ingruente mali recrudescentis tempore, eidem opportuna venæsectione & purgatione, quæ fit per epicrasin, nec non iis quæ hypochondria firmant, occurrendum.

§. VII.

Ophthalmiæ multum affinis est epiphora. Am bæ enim ab iisdem sæpe, externis, æque ac internis causis, gignuntur, utraque inflammationis genus, illa sanguinea, hæc serosa, illa ab impedito libero sanguinis per venas progressu, hæc ab intercepto sanguinis per glandulas in venas regressu, originem ducit. Est vero in epiphora perpetua falsæ & acris aquæ effluxio, ita tamen, ut plerumque pruritus & dolor molestus, cum oculorum & palpebrarum rubore & tumore, gravius ægrum detineat, quandoque vero effluens humor, acrimonia eminenti destitutus, oculum nec dolore, nec rubore afficiat, sed tantum illacrimatione molestus sit, adeoque mitiorem faciat lippitudinem. In oculi bulbo nullum quidem comparet vitium, palpebræ tamen tumet, vasa sunt dilatata, & si diu durat ex oculo fluxio, lentescit demum & crassescit humor, ac in lemas densatur, quibus palpebræ subinde, præsertim noctu, conglutinantur. Solenne hoc malum est catarrhosis, infan-

infantibus & pueris, inprimis si caput auræ frigida exponant. Et in his quidem fovetur ut plurimum a tumoribus glandularum colli, nec prius discedit, quam expeditis glandulis & reddito lymphæ per easdem libero transitu. Frequens etiam lippitudinis genesis post variolas & morbillos, quia in his ob æstum & ebullitionem succi temperatam diathesin exuunt, & salsam, impuram, viscidam contrahunt, quæ nisi superato morbo corrigatur, morbos diu trahentes, potissimumque id genus vitium oculis inducere solet. Datur præterea lippitudo, quæ epidemice infestat, & atmosphæræ, exhalationibus subtilioris acrimoniæ refertæ, vitio debetur.

§. IIX.

Sedes autem mali est in glandulis, quarum variæ sunt in oculo. Maxima harum, lacrymalis dicta, in orbita supra angulum minorem collocata est, & manifestum primum faciente STENONE, ex sex septemve ductulis, inter palpebrarum membranas decurrentibus & non longe a ciliis totidem distinctis osculis hiantibus, serum lacrimale falsum fundit, quod a punctis lacrimalibus absorbetur & per peculiarem ductum ad nares fertur. Dein in cantho oculi majori plures acini glandulosi consistunt, qui glandulis sebaceis accensentur & serum lentescens plorant. Sub palpebris etiam delitescunt glandulæ, ab inventore Meibomianæ vocatæ, & a MORGAGNI in sebacearum numerum relatæ, quæ juxta dorsum palpebræ eleganti ordine positæ, ad limbum hujus osculis hiant, e quibus stillare videtur illa, quæ in oculorum morbis palpebras conglutinat materia.

§. IX.

Iam, quando cunque excretoria hæc glandularum, ex nerveis & fibrosis tunicis conflata organa, a fero subtili acri, vel etiam ab acribus effluviis arroduntur, nerveæ glandularum membranulæ crispantur, spasmodyce contrahuntur, ut sanguinis per arteriolas advecti refluxus, ob venas constrictas, minus libere fieri possit, sed tubuli glandulosi a secedente sub mora hac fero, plus justo amplientur, & hac ratione ingens fiat feri falsi lacrimalis effusio. Ruborem autem & dolorem jungi, acrimoniæ humoris effluentis tribuendum, cui sæpe tanta copia salis acris, instar ammoniaci, præsertim in scorbuticis inest, ut Dn. PRAESES ex drachma una feri in lippitudine effusi, grana duo salis muriatici acerrimi, leni tantum evaporatione, obtinuerit, quod tamen ratione odoris & saporis multum differt a sale illo, quod post urinæ exhalationem restat, luculento indicio, peculiarem plane & mechanicam esse glandularum & oculi tubulorum excretoriorum structuram, ut serum falsum, sine contagio sulphuris foetidi, ut in urina, & sudore fit, admittat.

§. X.

Quæ quum ita sint, recta lippitudinem sanandi ratio, utique potissimum in edulcoratione feri falsi eiusdemque derivatione ab oculo ad alia loca & glandularum nimis remissarum robore restituendo, consistet. Nos quidem pro certo affirmamus, incipiens malum solo potu copioso infusi theiformis, ex herba veronicæ & semine fœniculi, ad aliquot libras, cum regimine diaphoretico per aliquot dies sumti, brevi & explicita curatione-

ratione fuisse expugnatum. Contra ea certum pariter, difficulter admodum sanationem recipere, si a diathesi humorum scorbutica invalescente fuerit enatum, nec cedere, nisi accedat prudenter instituta cura lactis, vel vaccini, cum aqua Selterana nupti, vel etiam feri lactis dulcis nostra methodo parati, nec non fontis medicati mineralis & martialis, interpositis idoneis laxantibus & diaphoretico-temperantibus pulveribus. Frustra enim omnis medicatio per alia remediorum genera, præsertim externa, tentatur, nisi interna hæc prius fuerint usurpata. Opus tamen etiam est, ut exacta victus & vitæ ratio accedat, vitando falsa, acida & acria, nec non frigus, & abstinendo a vino & spirituosiss, immo cerevisiæ potu, & sumto ordinarii potus loco decocto ex rasura cornu cervi, radice scorzonerae & semine fœniculi, usurpatis simul crebrius vesperi ante decubitum pediluviiis ex aqua dulci.

§. XI.

Externa, ut in aliis oculorum passionibus, sic & in hoc vitio circumspicte adhibenda. Hæc inter tamen Dn. PRÆSES frequentius non sine fructu usus est unguento, ex butyro insulso, saccharo Saturni & vitriolo albo debita proportionem composito, quod ad magnitudinem pisi maiori cantho oculi inditum, efficaciter, si prius internis rite fuerit prospectum, huic malo medetur, discutiente simulque roborante quæ gaudet virtute. Quid porro setaceis, fonticulis & vesicatoriis tribuendum in pertinacibus eiusmodi oculorum vitiis mitigandis, loquuntur observationes Medicorum & encomia de iis passim. Nos tamen mole-

stis his & incertæ sæpe efficaciae auxiliis, medentes melius posse supersedere censemus, si tantummodo, ex inventione *Dni* PRAESIDIS, vesicatorium grossi magnitudine nuchæ applicent, idque quotidie recens imponendo, exesam cutem & apertam servare per aliquot menses iubeant. Tum enim mira feri impuri effluit copia, & non tantum hi, sed alii etiam capitis morbi, exinde egregie levantur.

§. XII.

Serio autem monendum est, ophthalmiam & epiphoram perperam nimis refrigerantibus, adstringentibus, vel acribus collyriis & unguentis excipi. His enim oculi tabem, corrugationem, suffusionem, nec non epiphoram chronicam, rubentem, siccam & asperam fuisse inductam, quin palpebrarum exulcerationem concitatam, experientia docet. Si etiam sicca plane epiphora, abstinendum ab externis exsiccantibus, multo magis acribus, & oculus solo cataplasmate ex mica panis triticei, lacte & croco, tepide fovendus.

§. XIII.

Porro non infrequens est ille oculi rubor, qui sine inflammatione est & fugillatio audit. In hoc album oculi quandoque macula tantum rubra foedatum, quandoque totum per omnem sui ambitum, quandoque etiam ultra hunc & iridis quoque circulum, rubrum comparet, & omnia quæ aspiciuntur rubra videntur. Oritur hoc vitium plerumque a causa externa, ut contusione, quando sanguis ex minimis vasculis effusus & in grumulos abiens, adnatæ tunicae fibrillis firmius impingitur. Interdum tamen etiam internæ causæ debetur,

tur, ut in tubicinibus, animia inflatione & vasorum tensione. Ad abigendum hoc malum egregii usus est facculus radice sigilli Salomonis, herba euphrasie, floribus sambuci, rosarum & chamomillæ vulgaris repletus, vino calido maceratus & oculo impositus. Quod si vero rubor discuti renuit, insignem omnino opem præstat scarificatio oculi, ab HIPPOCRATE iam pridem *lib. de visu* commendata & nostra ætate ab Oculario Parisiensi, WOOLHVYSEN, postliminio in usum revocata, de qua pluribus lectu digna nuper edita Lipsiæ doctissima a celeberrimo PLATNERO dissertatio.

§. XIV.

Porro in externorum oculi vitiorum numero est macula alba, sive albugo, quæ in albo oculi radices fixas habet & ad corneam pertingit, visumque quodammodo, tegendo partem pupillæ, impedit, ac membrana est tenuis alba, quæ frequentius in pueris a variolis relinquitur, vel demum gignitur. Huic abstergendæ efficacissimum deprehendi collyrium, quod ex aqua chelidonii, vitriolo cyprio & saccharo Saturni est compositum, quo crebrius macula cum pluma est inungenda. Sequitur nunc grave istud malum unguis, Græcis: *πτερόγιον*. Quo quidem nomine Medici designant membranulam, quæ ex adnata tunica, in maiore plerumque oculi cantho, succrescit, colore albo conspicua est & ad iridem protensa, pupillam tegit, sicque visum impedit. Quod si vero hæc membrana, uti haud raro evenit, ita crassescit, ut carnis naturam induat, pannus audit. Vtrumque ob læsas & erosas tunicæ adnatæ fibrillas

accidit, quo facto, humor glutinosus exstillans ibique subsistens, spissescit & in membranæ speciem densatur. Aegre autem hic affectus remediis obsecundat, si tamen recens est, viride illud HARTMANNI collyrium, ex aqua calcis vivæ & sale ammoniaco, in vase æneo paratum, crebrius illitum, rudimenta membranosa colliquat iterumque dissolvit.

§. XV.

Nonnunquam cornea & adnata oculi tunica exterius obsidetur plane ulcusculis, quæ a Veteribus variis insigniuntur denominationibus. Causam his præbet asperum, vel erodens quid oculo immissum, item nimia feri lacrimalis acrimonia, præsertim in corpore scorbutico, nec non applicatio valde acris collyrii, etiam imprudenter per nimis acris & calida tractata ophthalmia. Ad mundanda igitur hæc ulcuscula non contemnenda est virtus collyrii, quod ex aqua rosarum, florum sambuci, calcis vivæ, tutia, & saturni saccharo, adiecta portione sufficienti aquæ ita dictæ d'arquebousade, compositum & affecto loco admotum. Dein pinguedo viperarum recens, non rancida, in aqua calida liquata, inter ophthalmica externa præcipuam merito fert laudem, cuius præstabilem efficaciam, tam ad sananda eiusmodi ulcera, quam detergendas albas, quæ corneæ insident maculas, & rudimenta unguis incipientis delenda, multis experimentis confirmatam habent probatissimi auctores, & inter hos maxime WEDELIVS in *amæn. mat. med.* & passim in scriptis suis.

§. XIV.

§. XVI.

In palpebras etiam non raro incidunt morbi, & inflammatio quidem tam sanguinea, quam serosa, ab impedito libero humorum per easdem motu, oriunda. Perquam aptæ enim sunt huic contrahendæ, quum interior earum membrana, quæ firmiter cum tunica albuginea, nec non perioſtio orbitæ cohæret, & a R V Y-SCHIO in *thes. anat. X. pag. 10. & 48.* elegantissime descripta & depicta, copiosis & tenuissimis sanguiferis vasculis, glandulis & papillulis nerveis sit dotata, ac præterea exquisito polleat sensu. Eadem autem, quam quæ in ophthalmia ac epiphora commendavimus, hæc inflammatio poscit præsidia, iisdemque solis non sufficientibus, prudenter administrata palpebrarum scarificatio, omne curationis punctum absolvit.

§. XVII.

Quando demum rigidi in ora palpebræ pilli, cilia dicti, intro ad oculum, ob nimiam tunicæ cui inhærent relaxationem, & ex parte etiam contractionem, recurvantur, molestam admodum, propter perpetuam irritationem, faciunt afflictionem, quæ non facile, nisi manu chirurgica, tollitur. Neque etiam sufficit pilos forcipe evellere, quia mox eadem crispatura renascuntur, sed necessarium est, ut acu candente eorum radices adurantur, sicque extrorsum flectantur.

§. XVIII.

Perspectis sic præcipuis qui externas oculorum partes infestant morbis; sequitur jam, ut paulo penitius consideremus illa vitia, quæ in interioribus oculi consistunt. & majoris momenti sunt ad visionem, sen-

stationum nobilissimam, minuendam, lædendam, aut tollendam plane. Vt autem eo rectius de horum origine, generatione, causis & his nitente perita medendi ratione nostram promere possimus sententiam; necessarium omnino erit, ut naturalem partium in oculo statum prius evolvamus. Iam ex physiologicis constat, eam oculi esse fabricam, ut cameram obscuram perquam accurate referat. Quemadmodum enim ad hanc construendam opus est primo loco tenebricoso foramine pertuso, dein pellucidis & convexis lentibus, per quæ recta linea luminosi radii transeant, ac demum superficie candida, in qua pictæ exhibeantur imagines; sic etiam in oculo omnia hæc sunt reperiunda. Speculum quippe tenebricosam choroidea & uvea tunica efformat, foramen per quod intrant radii constituit pupilla, humores pellucidi, præsertim crystallinum & vitreum corpus, ob convexitatem suam, lentis habent speciem, & expansus in fundo nervus opticus retinam facit tunicam, in qua comparent rerum visibilium imagines, quibus inde ad sensorium commune translatis, visus absolvitur negotium. Atque adeo in proclivi est iudicare, omnes visionis læsiones atque defectus horumque causas, vel in pupilla minus integra, sed obtecta, vel in humorum & corporum diaphanorum obfuscatione, aut alia præternaturali constitutione, vel etiam in retina tunica & nervo optico male affecto, consistere & merito quæri debere.

§. XIX.

Quod quidem ut pariter certa cum ratione fiat, cuiusvis harum partium, maximeque humorum, qui po-

potissimum ad visum faciunt, conditionem & proprietates, experimentis quibusdam physico-chymico-mechanicis sigillatim evolvemus. Tres autem in scholis Medicorum numerantur oculi humores, aqueus nempe, vitreus & crystallinus. Aqueus dicitur is, qui utramque oculi cameram, tam anteriorem, quæ inter corneam & uveam, quam posteriorem, inter uveam & lentem crystallinam, replet, quantitate minimus & admodum fluidus est. Hunc itaque ex oculo bubulo depromsi, cochleari argenteo indidi, & subdita candelæ flamma, animadverti, eundem non, ut alium quemvis aqueum humorem, inde ebulliisse, sed quietum semper mansisse, forsan propter particularum aëreo-elasticarum, a quibus ebullitio pendet, defectum. Deinde peculiare id quoque sub hoc experimento notavi, immunem plane mansisse humorem ab omni coagulo, quod tamen omnes succi nutritii lymphatici corporis humani, haud secus ac albumen ovi, promte subire solent. Totus potius blande exhalavit, relictis tantum exiguis in cochleari solidis & pellucidis particulis, quæ linguæ admotæ, falsum impresserunt saporem.

§. XX.

Alter humorum, vitreus, aqueo densior est, & hunc duodecies, crystallinum vero quater, mole superat, posterioremque oculi partem, retinæ ubique contiguus, occupat, & propria tenui membrana obductus, in excavato sinu crystallinam lentem suscipit. Hunc pariter examini subieci & posteaquam ipsum cochleari argenteo inieceram, accedente candelæ flamma, protinus in aquam limpida fuit liquatus, secedente mucilagine quadam crassiuscula,

uscula, quæ mihi tunica ipsum continens arachnoidea visa fuit. Nullam etiam ebullitionem sub validiori quamvis calore, adverti, sed totus paulatim in halitus solutus, relicta itidem massa solida exigua valde, saporis falsi. Dein integrum vitrei humoris corpus prunis ignitis inieci, sed totum sine, ullo gravi odore, qui alias ordinario in exustis animantium partibus, sive solidis, sive liquidis, observatur, avolavit. Illud autem, quod secesserat sub liquatione in cochleari mucilaginosum crama, solum immisi postea carbonibus, quod sub combustionem foetidum emisit odorem, relicto paucissimo saltem cinere.

§. XXI.

Tertius ex humoribus sic dictis in oculo, ob pelluciditatem, audit crystallinus, reliquis solidior, lenti-formis figuræ & ita locatus est, ut convexa facie subiecto vitreo inhæreat eidemque intercedentibus quibusdam fibrillis nectatur, a ciliari autem ligamento suspensus teneatur & excipiendis radiis luminosis adaptetur. Hic sub examine alia longe, quam bini priores, exhibuit phænomena. Etenim vitreus & aqueus rectificatissimo vini spiritui, nec non spiritui vitrioli immissi, nec coagulati sunt, nec ullam aliam experti mutationem, crystallinus vero in utroque liquore pelluciditatem amisit & turbidus factus est. Ad motus etiam candelæ in cochleari flammæ, in liquamen non fuit conversus, & prunis candentibus iniectus, corpus in dissectione exhibuit candidissimum, ex meris lamellis, facili negotio ab invicem separandis, conflatum. Et quum iterum igni injiceretur, flammam concepit, gra-

graveolentemque sparsit odorem, qualem omnis solida corporis animalis pars exspirare solet.

§. XXII.

Ex his igitur experimentis, id liquido patescit, aqueum & vitreum humorem parum inter se ratione naturæ & virium differre; vitreum tamen solidiorem esse aqueo, eam ob rationem, quia in cellulis tunicæ arachnoideæ, collectim confidentibus, aservatur. Crystallinum vero perperam humorem vocari, sed merito partibus solidis accenseri, & iam ab ipso HIPPOCRATE *lib. de princ. & carn. pag. 123.* thuri transparenti recte assimilari. Neque etiam hoc crystallinum corpus ex particulis homogeneis, uti aqueus & vitreus humor, sed heterogeneis, salino-sulphureis, non secus ac alias solidas corporis partes, esse conflatum.

§. XXIII.

Hinc porro veri omnino videtur simillimum, aliam esse originem humoris aquei & vitrei, quam crystallini. Hic enim, quum nihil aliud sit, quam peculiare ex lamellis solidis, interjecto succo quodam glutinoso, constructum in convexam figuram corpus, eundem in ipso iam utero; uti alias solidas corporis partes, produci, censemus. Humor vero aqueus a tenuissimis osculis arteriolarum & vasorum lymphaticorum, quæ ubertim in uvea & choroidea tunica, suppeditatur. Et vitreus ex subtili lymphâ, quam subtilissima arteriosa in tunica arachnoidea vascula fundunt, venit ac nutritur. Interim tamen solida crystallina lens, quia tenuissima arachnoidea & propria coërcetur membranula, quæ vasculis, succum tenuem pellucidum plorantibus, in-

structæ, inde utique suam conservationem suumque augmentum nanciscitur. Neque enim a veritate alienum videtur, per exilissima, tam adducentia, quam abducentia vascula, circularem quendam in oculi humoribus succedere motum, quem etiam HOVIVS asseruit ac demonstravit.

§. XXIV.

Ex interioribus, quæ in oculo consistunt & visui serviunt partibus, cognitu præterea dignum videtur ligamentum ciliare ipsaque iris, quæ in uvea tunica reperiuntur. Hæc quippe tunica, quæ in medio habet pupillam, ex duplici lamella fibrosa admodum & vasculosa composita est, interna nempe & externa. Interna suppeditat ligamentum ciliare, quod ex fibrillis musculo-motricibus nerveis, longitudinalibus & annularibus, copiosis etiam vasculis, est compositum, & nerveas fibrillas accipit a tertii & quinti nervorum paris ramo, qui dum nervum opticum intus sequitur, inter scleroticam & choroideam fertur ad uveam. In exteriori uveæ lamella iris formatur, quæ etiam ex tenuibus fibrillis & retiformi minimorum vasculorum congerie quæ varii coloris humorem, vel nigrum, vel cæsum, vel cæruleum ferunt, composita est, & circum pupillam conspicitur. Tam ligamentum ciliare, quam iris, tenues arteriolarum furculos accipit, a ramo carotidis internæ, qui cum nervo optico oculum ingreditur, & scleroticam pertransiens, ad choroideam excurrit & intus eandem vasculis innumeris nigri coloris obducit, ad constituendam obscuram speciem, in uvea vero ad efficiendos plexus retiformes varii coloris in iride & ligamento ciliari confert.

§. XXV.

§. XXV.

Est autem ligamentum ciliare ad visum perficiendum singularis usus atque utilitatis. Huius enim, seu sphincteris beneficio, pupilla mobilis fit, five dilatatur & coarctatur. Ea quippe fibrillarum nerveo-muscularium, quæ pupillam cingunt, est indoles, ut ad lucis, vel coloris splendidi & vividi, rubicundi, vel lignei accessum, notabiliter moveantur & constringantur, adeo, ut etiam dolores in iis, qui morbis oculorum laborant, non parum inde augeantur; contra vero ut ad nigrum colorem & in loco tenebricoso obscuro relaxentur, dilatentur & foramen amplius efficiant. Quem sensibilem motum, utique a nervosis furculis sortiuntur, eo quod hisce fortiter læsis, paralyti afficiatur pupilla, quod maxime fit in gutta serena, de qua infra uberius agemus. Præterea ex ligamento ciliari fibrillæ quædam nerveo-tendinosæ & musculares ad humorem crystallinum, seu potius eius tunicam, crystalloidem dictam, excurrunt, quarum beneficio, pro varia lucis receptione, crystallina lens pupillæ vel appropinquari, vel etiam vicissim ab ea removeri & ad retinam adduci potest.

§. XXVI.

Perspecto hætenus paullo accuratius partium oculi internarum statu, qui est secundum naturam, sequitur iam, ut qui in has partes præter naturam incidant morbos eorumque originem & causas, ad rectam ipsis medendi methodum formandam, paulo clarius exponamus. Et primum quod attinet ad humorum vitia, & sigillatim humoris aquei, hic quidem admodum exigua

guæ est quantitatis, nihilominus tamen evenit interdum, ut vel defectu, vel abundantia, vel etiam impuritate delinquat. Quando deficit, cornea subsidet, pupilla angustior redditur, atque lens crystallina ad pupillam & corneam, non sine visus diminutione, propius accedit. Si nimium redundat, corneam admodum dilatat, extrorsum urget & iustam distantiam a crystallino corpore avertit. Quodcumque vero, humor, & aqueus, & vitreus, a copiosioris sanguinis, lymphæ & ferius, quam par est appulsu ad partes externas & internas oculi, ac difficiliore lymphæ regressu, nimium incrementum, oculi bulbus ingentem, immo prodigiosam sæpe magnitudinem, sortitur. Contra ubi oculi partes non sufficienti sanguinis copia, propter obstructas minimas arteriolas, perfunduntur, minor redditur bulbus & tabes fit oculi, cui vitio inprimis obnoxii senes, scorbutici & qui gravioribus doloribus capitis, oculi, præsertim in ipsa ophthalmia, detinentur. Et sic utique contingere horum affectuum genesis, optime illustrat clarissimus Dn. SCHOBRET experimento, quo ligato in cane ramo carotidis, ipse oculus collabatur & flaccescit, ligata vero vena externa iugulari, in magnam molem attollitur.

§. XXVII.

Quod si autem aqueus humor, ab heterogeneis naturæ fixioris & compactioris, propter nimis dilatata vasculorum adducentium oscula, admixtis corpusculis, pelluciditatem quodammodo amittit, interceptis a moleculis his opacis innatantibus radiis luminosis, obscuræ & variæ sistuntur visui imagines. Hinc
qui

qui hoc vitio laborant, de simulacris vagarum rerum, de punctis nigris, de culicibus, de muscis, oculis obversantibus, conqueruntur. Plures quidem id esse suffusionis, sive cataractæ incipientis signum existimant, autumantes, corpuscula hæc obscura copiosius allata, tandem in pelliculam coire atque concreescere, de qua re mox infra plura dicemus. Verum, per plures annos eiusmodi corpuscula oculis obversantia, sine omni metu, vel successu cataractæ, annotavimus. Quandoque etiam cito fiunt & cito etiam sponte evanescent, nulla plane suffusione restitante.

§. XXIIIX.

Alia visionis læsæ species, quam recte & κατ' ἐξοχὴν suffusionem vocamus, a turbido factō humore non modo aqueo, sed & interdum vitreo, a Medicis considerata videtur. Accidit hæc plerumque, si causa est interna, in utroque oculo, & tunc quasi aranearum telæ, nebulæ, fumi, visui obversantur. Licet vero hæc sæpius primordia & rudimenta sint cataractæ veræ, tamen id pariter non est perpetuum. Nam observavimus sæpe in praxi, oculorum caliginem & visus diminutionem, quasi omnia per nebulas cernerentur, certis tantum temporibus & per certa temporis intervalla infestasse, sponte vero postea remisisse malum, vel idoneis remediis discussum fuisse. Affligit hoc vitium maxime senes, item cachecticos & hypochondriacos, qui ventriculi inflatione, debilitate alvoque adstricta laborant. Patiuntur inde multum oculi, & visio non tantum turbatur, cum cœcitatis metu, sed omnia simul duplicata videntur, id quod etiam in hystericis

non semel notavimus. Cachecticis quoque a fortiori & infueto corporis motu, a balneo nimis calido, mox talem suffusionem accidisse, observatum a nobis est. Quin novimus, mense Martio, circa æquinoctiale tempus, hebetiorem, ac si continuo ante oculos versentur nebulæ, visionem factam.

§. XXIX.

Sed hæc vitia omnia utique ab impuris, crassioribus & rudioribus in oculorum humores ob vehementiorem sanguinis & humorum ad superiora impetum, delatis moleculis eveniunt, interim quia tantum symptomata sunt aliorum morborum, vel sua sponte sæpe cessant, vel convenienti remediorum, in principio recta methodo oblatorum usu, facile discutiuntur, quæ de re infra latius. Et sane hæc ita esse luculenter confirmat experientia, nec alienum erit inferere hoc loco casum ex TIMÆO a GÜLDENKLEE *lib. I. cap. XXVII.* de matrona gravissima febre semitertiana laborante, quæ ingravescente paroxysmo, de oculorum caligine & obversantibus corpusculis ante oculos conquesta, remittente vero paulo post febre, omnia cessare, & recurrente febre, iterum recurrere, notavit. Dum hæc scribimus, petiit etiam a Dn. PRAESIDE Medicus quidam celebris Noribergensis consilium, nomine viri quinquaginta annorum, qui ex diuturna diarrhœa, quam postquam diu nimis avtocratix naturæ superandam reliquisset Medicus, demum valide sistentibus cohibuit, valde debilitatus, in ciborum inappetentiam, anorexiam & tensivum hypochondriorum dolorem incidit, subsequente plenaria visus obscuratione, quæ ta-

men

men pilulis laxantibus & essentiis stomachicis balsamicis, nec non mixtura, extinctura millepedum & spiritu carminativo de tribus, sublata iterum fuit. Sed quia elapso mense rediit malum, Domini PRAESIDIS imploratum auxilium, qui suavit continuationem modo dictorum remediorum, & commendavit præterea elixirium suum stomachale & tincturam antimonii acrem, cum liquore cornu cervi succinato.

§. XXX.

Sunt etiam nobis in memoria exempla, ubi solis stomachicis, roborantibus & pilulis balsamicis, methodo Beccheriana confectis, item tragea stomachali, quæ radicem valerianæ, meu, semina cymini, fœniculi, carvi, cubebas, cardamomum & quadruplum ad omnium pondus sacchari habuit, ante cibum sumenda, cui etiam interdum folia fennæ, aut rhabarbarum admixtum, ejusmodi visus obfuscationes, per intervalla remittentes & redeunt, cum aspectu humorum in oculo turbidorum, sub divina gratia feliciter expugnâvimus. Quod si enim humorum cursus & impetus a capite & oculis ad alia loca divertitur, & humores recrementitii impuri per renalia cribra & cutis emunctorium placide educuntur, fit, ut per abducentia vascula, quas HOVIVS nervoso-lymphatica vocat, impuri crassi succi absorbeantur, per adducentia puri advehantur, & hac ratione pristina claritas humoribus reddatur.

§. XXXI.

Evenit vero non raro in ophthalmia, præsertim graviori, in primis ab applicatione & instillatione collyriorum refrigerantium, ut obnubilatio visus ex tur-

bidis oculorum humoribus succedat. Hæc maioris, quam prior momenti, & nisi Medicus idoneis efficacibus remediis in principio statim succurrat, & exterius discutientia, quæ inter mirificam opem præstat sal volatile salis ammoniaci siccum, cum oleo cephalico roboratum & naribus susceptum, exhibeat, periculum est, ne visus perdatur & iusta cœcitatis metus.

§. XXXII.

Gravior jam dijudicanda venit controversia de cataracta, ubi sedem suam obtineat. De hac constans à primis fere Medicinæ incunabulis, & a GALENI, usque ad nostra temporatenuit sententia, eandem esse pelliculam quandam, sive membranam, interius pupillæ, ceu vélum, obductam, quæ radiorum lucis ingressum præcludat. Hanc membranam ex particulis impuris, terrestribus, opacis, humori aqueo innatantibus, concreescere & firmiter uveæ adnasci. Ideoque chirurgica opus esse operatione, & pelliculam hanc acu per chirurgum immissa, prudenter deponendam ac deprimendam, quo remoto velo, per pupillam radii luminis libere illabi & per pellucidos humores ad retinam pertingere queant.

§. XXXIII.

At vero sub initium huius seculi, celeberrimi nominis Medicus Gallus, BRISSEAU, anno c1686, & biennio post ANTOINE MAITRE JAN, communem hanc sententiam in dubium vocarunt non modo, sed & experimentis & accurate in defunctis institutis observationibus destruere conati sunt. Aperte enim demonstrarunt, pelliculam interius non dari,
nec

nec cataractæ veræ sedem in humore aqueo esse quærendam, sed in crySTALLINO. Hunc quippe penitus turbidum, obscurum, album, immo aridum & exsiccum reddi, & in operatione acu, a cohærentibus ligamenti ciliaris fibrillis, item a membrana vitrei humoris, separari, e sede sua dimoveri & deorsum deprimi. Sic radios luminosos libere per vitreum humorem ad retinam transire, & visum, modo hic pellucidus, salvus & integer sit, fieri adhuc posse sine crySTALLINO. Horum in sententiam concessit etiam clarissimus Germanorum Medicus & Chirurgus, Dn. HEISTERVS, ac egregium, plurimis exacte institutis observationibus instructum tractatum, de hac materia conscripsit, qua veritatem acriter asseruit & mota in contrarium dubia solide discussit.

§. XXXIV.

Fuerunt tamen jam ante hos, qui eadem de cataractæ sede & ortu professi sunt haud obscure. Clarissimus quippe ille Jenensis Professor & Anatomicus, ROLFINKIVS, *dispp. anatom. lib. I. cap. XIII.* disertis verbis tradit: suffusionis & cataractæ in oculis causam, non esse concretionem humoris aquei, sed ipsius crySTALLINI incrassationem, addens: *confirmavit id binis vicibus mea attenta in oculis defunctorum observatio,* & concludit demum: *hoc tamen perpetuo ita evenire, pronunciare non ausim.* PETRVS etiam BORELLVS in *append. Cent. III. obs. LXI. pag. 279.* jam tum perhibuit, cataractam non esse pelliculam, quæ acure movetur, sed crySTALLINUM humorem obscurum, quem de loco pellat acus, ruptis eius venulis suspensoriis. Nec

non RHODIVS Cent. I. obs. LXXXI. vidimus, inquit, anno MDCCXXIV. in theatro anatomico, FRANCISCI PLAZZONI ductu, suffusionem inter tunicam corneam & uveam, humori crystallino oppositam, cuius materia non erat pelliculæ similis, ut vulgo creditur, sed dura & mediocriter crassa, squamæ corneæ in modum, candelæ tamen admota, aliquantulum pellucida.

§. XXXV.

Nos quidem in ejusmodi observationibus & operationibus non sumus adeo exercitati; nihilominus tamen nobis etiam optima & veritati consona videtur revocata a BRISSEAU de cataracta sententia, idque has potissimum ob rationes. Scilicet ex corpusculis in humido natantibus, fibrosa stamina, multo magis ex staminibus contentam pelliculam, concrefcere & construi, plane non videtur probabile. Intestinus enim, quo fluida gaudent, partium motus, talem unionem & solidescientiam impedit. Dein exigua admodum humoris aquei est quantitas, quæ non capit tam copiosas terrestres particulas, ut invicem coalitæ, talem pelliculam conficere possint. Tum aqueus hic humor homogeneus est ac tenuissimus, omnemque coagulationem, ab igne, a purissimo vini spiritu & vitrioli spiritu, respuit, neque tamen facile moleculæ solidæ, nisi mediante succo quodam glutinoso, invicem concrefcunt. Demum pellicula ejusmodi tunicæ uvenæ firmiter concreta, ægre admodum, nec sine dilaceratione fibrillarum & vasculorum insigni, mediante acu posset divelli, quod iterum non fieri operatio testatur.

§. XXXVI.

§. XXXVI.

Igitur longe probabilior utique videtur hæc sententia, in humore crystallino consistere cataractam, dum tunica crystalloides densa primum fit & opaca, postea vero totum crystallinum corpus densatur, exsuccum & opacum evadit. Hoc si factum, cataracta a Chirurgis judicatur ad operationem matura. Vbi enim tunica quæ lentem involvit obscurior tantum facta & luminosi radii quadantenus adhuc penetrant ad retinam, operatio commode institui nequit, eo quod, non sine difficultate firmiter inhærens membrana posset divelli. Si vero totum corpus crystallinum aridum, opacum & exsuccum redditum, & lucis radii plane non ad retinam amplius pertingere possunt; ipsa ariditas lentis facit, ut facilius atque feliciter a vitreo humore & fibris ligamenti ciliaris separari & ad fundum oculi detrudi queat. Ne dicam, ipsum hoc crystallinum corpus longe magis ad conglutinationem, obfuscationem & exsiccationem esse aptum, quam vitreum & aqueum humorem. Hoc enim ex lamellis & tenuissimis canaliculis, linea parallela juxta se positis, coagmentatur, ita tamen, ut per interstitia contiguarum lamellarum succus quidam glutinosus feratur subtilis. Quando vero lamellæ hæc arctius quoad latera accedunt & plane concrescunt, densum & opacum fit corpus & vera excluditur cataracta.

§. XXXVII.

Sic etiam, quid per glaucoma intelligendum, & ubi sedes ipsius constituenda, ambigunt auctores. Pluri-

mi glaucoma id volunt esse, quando pupilla intus opaca colorem ex albo viridescentem refert & inde visus tollitur, notamque ipsius in eo ponunt, quod paullo profundius per pupillam opacitas conspiciatur, ex quo postea judicant, humorem crystallinum in hoc oculi vitio esse pellucidum, vitreum vero opacum. Verum ea vitrei humoris, ut suprameminimus, est indoles, ut ex aqua tenuissima, nullo modo coagulabili & in variis cellulis membranaceis contenta, constet, in quam nec densitas, nec concretio cadere potest. Volumus igitur potius id glaucoma vocare, quando postica corporis crystallini pars, vitreo humori adhærens, coalescere & siccescere incipit, antica portione adhuc pellucida manente.

§. XXXIIX.

Alia vero est quæstio: annon in interiori uveæ parte gigni queat pellicula, pupillam tegens & cœcitatem inducens? Nobis quidem hoc non videtur a vero alienum, licet, rarius id contingere ultro, largiamur. Origo tamen & genesis eiusmodi veli, neutiquam ex humore aqueo coagulato, aut ex particulis crassioribus invicem in eo coalitis, petenda, sed potius ab eadem causa derivanda, propter quam in oculo aliisque partibus præter naturam succrescere solent tunicæ. Jam vero in comperto est, id fieri a succo glutinoso, ex læsis & fauciatis tunicarum fibrillis exsudante & successive in membranæ speciem densato. Ideoque, quum in lamella interiori pupillæ ligamentum sit ciliare, ex fibrillis nerveis, musculosis & innumeris vasculis sanguineis compositum, his læsis, vel erosis, generari

nerari posse eiusmodi pelliculam, videtur omnino probabile. Nobis certe innotuerunt casus, quod a gravi contusione & percussione oculi, a vulnere iridem penetrante, nec non post variolarum morbum, succreverit pellicula, non coloris albi margaritæ similis, uti in vera observatur cataracta, sed cæsi & flavi, quæ vero ob firmam cum ligamento ciliari cohæsiōnem, plane non, vel minimum difficulter admodum, & non nisi magno cum damno & maioris mali periculo, chirurgica manu potuit separari.

§. XXXIX.

Succedunt nunc illa visus vitia, quæ a causis intra cerebrum, & quidem in nervis visioni servientibus, excluduntur; inter quæ præcipuum est id, quod amaurosis, & barbaro nomine, gutta serena, audit. Sanus & integer in hoc apparet oculus, neque in tunicis ipsius, neque in humoribus, labes conspicua est ulla, tantum quod pupilla nimium & præter naturam ampla adque omnem lucis splendorem immobilis plane compareat & paralytica sit reddita. Claro autem & evidenti ipsum hoc est testimonio, in nervis esse vitium. Quumque non tantum nervus opticus oculum subeat, & in retinam, principale visus organon, in fundo expandatur, verum etiam tertii & quinti nervorum paris propagines, cum optico orbitam ingrediantur, & ad ligamentum ciliare atque pupillam ferantur, nervos hos in gutta serena pati & sedem causæ ipsius heic constituendameffe, patet utique.

§. XL.

Jam quidem inter omnes, qui philosophiam corporis humani profitentur, constat: per nervos, recte & secundum naturam constitutos, fieri perceptiones & sensus, visum hinc mediante potissimum nervo optico,

sano & integro, celebrari, & vicissim huius abolitionem in gutta serena, sive imperfecta & incipiente, sive perfecta & chronica, a vitio nervorum in oculo pendere. Sed qua potissimum, & quali labe, nervi hi in amaurosi sint affecti, ab omnibus non æque ad veritatem accommodate fuit definitum. Multi quippe, & tantum non omnes, accusarunt nervi optici obstructionem, a lymphâ crassiuscula, qua tubuli hoc in nervo occludantur, ut liquidi nervei ad retinam affluxus, vel sufflaminetur, vel intercludatur plane. Verum nondum ab Anatomicis evictum est, nervis inesse canaliculos & tubulos, per quos liquidum recto vehatur tramite. Neque etiam per cerebri & oblongatam medullam crassior & cohærens lymphâ, sed longe tenuissimum & ad cohæsiorem minime aptum liquidum fertur. Hinc in nervos obstructionem cadere neutiquam videtur credibile, multo minus in opticis nervis obstructio a materia ex cerebro advecta commodum invenit locum. Quin potius, sicuti in genere omnis paralysis causa & ortus a nervis, vel compressis, vel nimis humidis & relaxatis, vel etiam nimis constrictis & tensis recte deducitur; ita in gutta serena, paralysis quoque & easdem causas subesse, confirmatius asserimus.

§. XLI.

Confirmant asserti huius veritatem uberius observationes anatomico-practicæ, quibus ea, quæ guttam serenam fecerunt, sectione defunctorum, innotescunt. Nimirum relaxationem nervorum sæpissime ab effuso sero induci, testatur WEPFERS *histor. apoplect. IV.* qui serum in ventriculis cerebri copiose collectum & thalamos nervorum opticorum comprimens, in gutta serena

serena cum capitis dolore vehementi observavit, item *Petr. PAW obs. anat. II.* nec non *SCHENCKIVS in M. N. C. Dec. II. an. V. obs. 246.* Patet hinc facile ratio, quare post casum ab alto & gravem capitis percussione, sæpius gutta serena, cum aliis symptomatibus subsequatur, uti quidem cum *HILDANO Cent. V. obs. VIII.* fidem facit *AMATVS LVSITANVS Cent. VII. obs. LXIV.* & a nobis quoque crebrius observatum fuit, ac in *Medic. consult. Tom. V. Decad. II. cas. II. pag. 92.* exemplo perquam notabili confirmatum. Testantur quoque observationes practicæ, a metastasi feri facta ad caput, in febribus acutis, variolis, morbillis, nec non a mensium, hæmorrhoidum & lochiorum retentione, cephalalgiam sævam, vertiginem & guttam serenam, fuisse subsequuta. Idem ab improvido fortiorum emeticorum usu, maxime in corporibus impuro sero abundantibus, evenire, nosmet ipsi annatovimus & *HILDANVS Cent. V. obs. XIX.* simile consignavit exemplum, nec non *WEDELIVS in dissert. de gutta serena.*

§. XLII.

Vicissim interdum gutta serena a vehementi spasmō & constrictione nervorum opticorum inducitur. Crebrius enim observavimus, motibus convulsivo-epilepticis supervenisse guttam serenam. Et de colica convulsiva, cum pertinaci alvi occlusionē, referunt *M. N. C. Dec. III. Ann. III. obs. LXXXI.* quod subsequam habuerit amaurosin. Ita etiam a mercurialibus intempestive adhibitis, ob validiorem spasmum inde nervis inductum, hanc visus abolitionem productam, testatum faciunt *Act. Hafn. Vol. I. obs. LXXVI.* Inde quoque rationem petendam esse putamus, quare ab intempestive consolidatis ulceribus, fistulis, repulsa scabie, tinea ca-

pititis aliisq; fuerit suborta amaurosis, cujus generis exempla SENNERTVS *Prax. lib. I. Part. III. c. XLIV.* TVLPIVS *lib. I. cap. X.* TIMAEVS a GÜLDENKLEE *lib. I. cas. XXIX.* nec non M. N. C. *Cent. VII. p. 303.* memoriæ prodiderunt. Quin eandem ob causam, frigida tantum fronti applicata, guttam serenam concitasse leguntur, auctore PLATERO *Prax. lib. I. cap. VII.* Nec omit-tenda commemorabilis hanc in rem observatio PECH-LINI, *obs. XLII.* de gutta serena. menstrua, cum capitis dolore, ob catameniorum defectum. Quandoque præterea nervi optici compressionem in causa esse, recte jam judicavit PLATERVS, ex tumore globoso, quem prope nervos visorios, in gutta serena laborante, post mortem, deprehendit. Singulare autem est, quod habet SPIGELIVS, de femina amaurosi affecta, in cuius cadavere anteriores cerebri ventriculos compressos concretosque, & nervos opticos marcidos ac duplo minores solito fuisse, notavit.

§. XLIII.

Ad curationem gravis huius oculorum affectus quod attinet, in genere tenendum: inveteratum ipsum, in quo nihil plane lucis, vel splendoris in oculo percipitur, omnem eludere medicationem; si vero incipiens est gutta serena, imperfecta, aut periodica, quæ certis mensibus, diebus, vel horis redit, non omnis salutis spes decollavit. Confirmatum id habet Dn. PRAESES exemplo feminae, quadraginta annorum, quæ post diuturnum mœrorem subito in menstrui fluxus suppressionem & cœcitatem ex gutta serena incidit, ita, ut per binos menses omni destituta esset visu, balsamo tamen spirituoso, sic dicto vitæ, semel quotidie cum linteo duplicato fronti & temporibus exterius applicato, & inte-

interius datis pilulis balsamicis, nec non spiritu cornu cervi succinato, cum tinctura antimonii acri, liquore anodyno minerali & essentia castorei, visum ex voto recepit. In ea quoque periodica visus privatione, quæ hypochondriacis, qui alvo obstructa & flatulentius vexantur, solennis est, aquas Burbonenses in Gallia, item aquas Fessyenses, interne & externe usurpatas, eximie profuisse, novit Dn. PRAESES. Idem etiam, ex relatione liberi Baronis ex Gallia redeuntis, habet, Medicum hypochondriacum maniacum, diu simul laborantem gutta serena, pulvere ex cinnabari nativa & limatura martis, æquali pondere nuptis, confecto, & per aliquot menses quotidie assumpto, perfectæ redditum sanitati. Ultimum autem in hoc gravi oculorum vitio esse solet salivatio mercurialis, quam felici cum successu fuisse celebratam, exemplo confirmat cl. HELSTERS, *tr. de amaurosi.*

§. XLIV.

Sed ere erit, ut præter ea, quæ jam sparsim, de reſta oculorum vitiis medendi ratione, inseruimus, observationes & cautiones quasdam, ad felicem medicationem suscipiendam, adhuc subnectamus. Observatum quippe fuit, illas suffusionum species, quæ guttæ serenæ nomine insigniuntur & a causa interna, intra cranium & cerebrum proficiscuntur, longe felicius & facilius sanationem recipere, in infantili, puerili & juvenili ætate, quam in virili ac senili. Evenit hoc in omnibus fere gravioribus capitis morbis, epilepsia, motibus convulsivis, paralyſi & omnibus fere deliriorum speciebus, adeoque etiam in gutta serena. Etenim juniora ejusmodi corpora, dum adhuc crescunt & partes solidæ lapsu temporis aliam figuram, magnitudinem,

majusque robur acquirunt, magna etiam in statu præternaturali fit mutatio, ad emendendam, vel planetolendam morbosam dispositionem.

§. XLV.

Deinceps & hoc notatu dignum, quod illa visionis vitia, quæ a nervis male affectis, præsertim irritatis & spasmo nimis constrictis, proficiscuntur, facilius medicationem admittant, inprimis si sub initium occurratur, ac si a stagnatione, aut prorsus effusione humorum, originem ducunt. Evenit id non raro ab excrementis tenuioribus, ex corporis ambitu ad interiora repulsis, nec non aliis consuetis excretionibus suppressis, tumque totus curationis cardo in eo versatur, ut recrementitia materia ad exteriora agatur & per congrua emunctoria expellatur. Perficitur autem hoc potissimum si corpus ad blandam continuam diaphoresin disponitur, eumque in finem apprime utiles sunt pulveres bezoardici cinnabarini, pulvis Marchionis, cum bezoardico minerali & cinnabari, addito quandoque tantillo camphoræ, item spiritus bezoardicus Buffi, cum liquore nostro anodyno minerali, nec non infusa theiformia ex summitatibus millefolii, herba cardui benedicti, floribus sambuci & chamomillæ vulgaris, concinnata.

§. XLVI.

Porro frequenti confirmatum habemus observatione, in omnibus fere oculorum morbis, siue in nervis, siue in humoribus, siue in tunicis, vitium hæreat, nihil esse conducibilius, quam intestinorum canalem a sordibus excrementitiis probe repurgare, quum hoc neglecto, maior inde sanguinis & humorum ad caput fiat impetus & vitium oculi ingravescat. Hinc antiquissimi Medicorum, HIPPOCRATES & qui post eum fuerunt, alvi sub-

subductionem, serio suaserunt. Egregius inprimis hanc in rem est CELSI locus *lib. VI. cap. VI. 37.* sic habens: *nonnulli, quum aliquandiu nihil vidissent, repentina alvi profusione, lumen receperunt. Quo minus alienum videtur & recenti re, & interposito tempore, medicamentis quoque moliri deiectiones, quæ omnem noxiam materiam in inferiora depellant.* GALENVS ophthalmicos per unam purgationem curatos vidit, & idem fere PECHLINVS *de potu thee pag. 27.* perhibet, *in oculorum, inquit, inflammationibus, quum frustra diu laboratum topicis & collyriis, unico saepe purgante, totum morbum profligavi.* Necessarium autem est, ut id per benigniora, blanda & per epicrasin laxantia perficiatur, quum purgantia acriora, drastica nervoso generi penitus sint infensa. Nos eum in finem commendamus pilulas balsamicas frequentius sumendas, quibus, si materia vitiosa altius federit, aliquot grana mercurii dulcis, extracti hellebori nigri, nec non pulveris castorei commiscenda.

§. XLVII.

Præterea in præstantissimis adversus oculorum morbos remediis est venæsectio, inprimis etiam in cœcitate repentina, ex casu ab alto, gravi capitis percussione, tanto magis sub ebrietate eveniente & plethorico corpore existente. Veteres quidem venam in fronte & temporibus pertundi voluerunt, sed longe tutior est recepta nostro tempore methodus, venas jugulares externas incidendi. Multum enim refert, ut in loco propinquo sanguis extrahatur, quo humor sanguineus stagnans, vel plane alveis suis elapsus, eo promptius derivetur. Et hanc utique ob causam factum, quod, memorante ALEXANDRO BENEDICTO, quidam a vulnere in fronte accepto, a cœcitate liberatus. Interim si fluxus hæmorrhoidum, aut mensium irregularis, vel suppressus, in causa est, sanguis in pede mittendus, vel primum in superioribus, & postea in inferioribus, vena secanda.

§. XLIX.

§. XLII.

Tum experientiae suffragio firmum est, uti in omnibus capitis & nervorum morbis, sic etiam in iis, qui oculos detinent, ventriculi & virtutis ipsius digestivæ rationem esse habendam. Obtinendum hoc maxime exacta victus ratione, vitando omnia, quæ pravos succos ingignunt, quæ difficiliter solvantur, quæ flatus creant. Dein stomacho languenti succurrendum pulveribus & trageis stomachalibus, concinnandis e.g. ex radice valerianæ, zedoariæ, pimpinellæ albæ, meu, semine anisi, fœniculi, fileris, corticibus aurantiorum, floribus melissæ Turcicæ, salviæ, macis, cinnamomo & cardamomo minori, addito demum æquali omnium pondere, saccharo canto albo, quippe quæ ante coenam, vel prandium deglutitæ, omnibus aliis facile palam præripiunt. Potest etiam elæosaccharum parari, ex saccharo & orientalis non adulterati balsami de Mecca essentia, quæ cum spiritu vini tartarifato alcoholisato conficitur, addendo in opulentioribus, balsamum de Peru & ambram.

§. XLIX.

De externis tandem & topicis hæc monenda habemus: frigida quidem ad integritatem visus servandam exterius prodesse, dum roborante fibrillas nerveas & leniter stringente tubulos virtute, nimium succorum appulsum arcant, eamque ob causam medicatas etiam aquas, subtili vitriolo, aut marte foetas, morbis oculorum, & arcendis, & sanandis, egregie provideo usu servire. Sed ubi ardor & dolor oculum tenet, nil deterius externo frigidorum collyriorum usu, ita prorsus, ut, non tantum humores oculi inde turbidi fiant cum visus hebetudine, verum etiam epiphora chronica, suppurationes & ulcera cancrofa in ipso visus organo gignantur. Contra oculorum hebetudines & suffusiones efficax quoque, prisco iam ANAZARBEI testimonio *lib. II. cap. XCIV.* est viperarum pinguedo, in aqua recenter liquata & oculo immissa. Teste enim colore cæruleo, quem ex vasis cupreis extrahit ac induit, pollet subtili principio alcalino, & propter hoc abstergente & discutiente virtute prædita est. Hinc licet in principio illita ardorem & dolorem excitare videatur, ipsum tamen hoc salubritatis fert indicium, ad invitandum nempe sanguinis & fluidi nervei, in veteri vitio, ad oculos affluxum, modo inflammatio absit. Idem fere præstat gallinarum pinguedo, qua illita, sive ad aliquot guttas oculo instillata, periodicam visus obfuscationem discussam, & cessante pruritu atque calore, oculos incla-

ruisse, nosmet ipsi novimus.

FINIS.